

1302

Op. L.



Ein Christliche Leichpredigt

In der Sepultur
der Edlen / vnnnd vieltugentsamen
Matronen Ermgardten von Jagow / Christoff
von Bredowen seligen / wellandt auff Grem-
men etc. erbgewessen / widwen / Gehalten
den 13. Octobris anno 84. vnd zu trost
den nachgelassenen Erben vnnnd zu
gehöriger freundschaft in druck
verfertiget.


Durch.

Jacobum Schrödern Pfarhern
zu Kremmen.

Rom: 14.

Vnsr keiner lebet im selber / vnser keiner stirbt
im selber / leben wir / so leben wir dem Herrn
sterben wir / so sterben wir dem Herrn / darumb
wir leben oder sterben / so sind wir des Herren /

Gedruckt zu Berlin / Durch Nicolaum Volken.
Anno M. D. LXXVIII.



Vorrede:

Dem Edlen vnd

Ehruesten Heinrichen vnd Hans-
sen Gebrüderu von Bredow / auff Gremmen
Erbgesessen / auch den Edlen / Ehrenreichen vnd
vieltugensammen Jungfrauen Annen / Eli-
zabeten / Magdalenen vnd Adelheiten von
Bredow / des seligen vnd in Gott ruhenden
Christoff von Bredow zu Gremmen gelasse-
nen Kindern / Meinen großgünstigen
Juncfern / auch meinen günstigen
fürderinnen vnd lieben
geuattern.



Nach vnd fried von Gott dem
Vater durch Jesum Christum
onsern Herrn / neben wünsch-
ung aller zeitlichen vnd ewi-
gen wolffart zuuor. Edle vnd Ehrueste / auch
Edle vnd vieltugentsame großgünstige Junc-
fern vnd Jungfrauen / liebe geuattern / Nach
dem der Allmechtiger Gott / aus veterlichen wil-
len / aus diesem jammer vnd elendsthal mit gna-

A ij

den

den abgefördert hat die Edle Ehrenreiche vñnd
vieltugentsame Matron Eringardten von Za-
gow/ Ewre Herzallerliebste vñnd selige Mutter
Vñnd ich nach vormögen / zu ihrer Christlichen
begrebnis / die leichpredigt gethan / ihr aber al-
lesampt / neben andern zugehöriger freund-
schafft / wegen grosser traurigkeit / diese trostpre-
digt / zu der zeit / in gedechtnis zu behalten fast
vñnvermögens gewesen seid: Darumb ich
denn / zum theil aus noht / vñnd auch wegen eh-
licher bitte vñnd anhalten / Ihnen solche predigt
mit zutheilen / bin vorursacht worden dieselbe
in druck zuuorfertigen lassen / vñnd Euch solche
wiederumb zu lesen / Dediciren wollen / Vñnd
zweiffele nicht das nicht allein E. E. vñnd T.
aus derselbigen sich / in diesem zugestandenem
leide / ehlicher massen trösten werden / Sondern
das auch andere viel mehr / nach dem Christlich
en vñnd Gottseligen/ Ewer lieber vñnd Seel-
gen Mutter/angezogen exempel/ ihr leben anzu-
stellen / sollen verursacht werden. Bitte der-
wegen dinstlichen E. E. vñnd T. wolle mit die-
ser meiner geringen dinstzeigung vñnd wol-
meinen / günstlichen für lieb vñnd gut nemet
Gott trewlichen empfohlen / Datum Gremmen.
am tage Martini Anno 1584.

E. E. vñnd T. williger
Jacobus Schröder pfarr.

2. Cor. 4 .1. 5.

Unsere trübsal / die zeitlich vnd Leichte ist
schaffet eine ewige vnd vbermaß wichtige
herrlichkeit / vns die wir nicht sehen auff
das sichtbar / sondern auff das unsichtbare.
Den was sichtbar ist / das ist zeitlich / was aber
unsichtbar ist / das ist ewig. Wir wissen aber /
so vnser irdisch Haus dieser Hütten zerbro-
chen wird / das wir einen bau haben von
Gott erbawet / ein Haus nicht mit henden ge-
macht / das ewig ist im Himmel etc.

Wir begehren abermals / geliebten
in Herrn / leider die trawrige Jahr
zeit / in dem wir diesen elenden vnd
betrübten gang gethan / vnd der
leiche gefolget / auch zur ruhe beleis-
tet die Edle vnd Vieltugentsame Matron Ermgardt
von Jagow / Christoff. von Bredowen seligen / Wid-
wen / der Seelen Gott in ewigkeit gnade. Denn eben
gegenwertiger October / vnd folgendes der Nouem-
ber die sonderlichen / ja auch ganz gefeslichen Monate
im Jahre sein / in welchen / der grausamer würger vnd
Leutfresser der grimmige Todt / nicht allein pflegt
zu rumoren vnd vbel Haus zuhalten im ganken
Menschlichen geschlecht / sondern auch dem Ader-
lichen stam vnd geblüt der von Bredow vnd dessen
zuehörigen / hefftig pflegt zu zusehen / wie innerhalb
A 3 Zehen

Sehen Jahren die erfahrung (Gotte geklagt) vber
flüssig bezeuget. Vnd wird vns nu abermals vrs
sache gegeben/ den kleglichen vnnnd erbermlichen zus
stand / dieses elenden vnnnd wegflüchtigen Lebens / zu
bedencken vnd zubetrachten / das der Mensch / vom
Weibe geborn / eine kurze zeit lebe / sey voller vnruhe/
gehe auff wie eine blume / vnd falle abe / fliehe dahin
wie ein schatten / vnd bleibe nicht / wie der vielgeplags
te / vnd doch gedultige / Idumeer König Hiob aus erf
ahrung in seinem Buch Cap. 14. bezeugt / vnd alles
fleisch vorschleift / wie ein kleid / denn es ist der alte
Bund du must sterben / sagt der Geistreiche Syrach
Cap: 14. ja alles was aus der erden kompt / mus
wider zur Erden werden / wie alle Wasser wider ins
Meer fließen / Item Cap: 41. Mögen demnach wol
mit dem heiligen Gottes Manne Moyses aus den 90.
Psalm beten: HErrre lehre vns bedencken das wir ster
ben müssen / auff das wir klug werden.

Denn wir arme Sünder können vnsern jammer
leicht aus den augen sehen / wo nicht der Todt tegli
chen durch seine Tagelöhner an vns arbeitet / das wir
die höchste klugheit vnd weißheit (nach dem vnuorgeng
lichen vnd ewigen gut zu trachten) hindan sehen / vnd
also in thumfänheit / vnserer herzen an das vngewisse
vnnnd wegflüchtige zeitliche hangen / vnnnd gedenden/
disß leben sey vns ganz vnnnd gar zu erb vnnnd eigen ge
geben / vnangesehen / das vns der Todt zu augen vnd
negeln heraus lucket / vnnnd wir vnseres lebens nicht ei
ne stunde / ja nicht eines augenblicks sicher sein / wie
wir den auch zumahl wenig guter vnnnd frölicher tage
in vnserm ganzem leben zehlen (den es ein Elend vnnnd
jammersüch ding ist / vmb aller Menschen leben / von
Muttere

Mutterleibe an bis sie in die Erde begraben werden /
die vnser aller Mutter ist Syr: 40.) Darumb sollen
wir / nach der lehre Christi Matt: 6. nach dem reiche
Gottes trachten / vnnnd vns schätze im Himmel sam-
len / da sie weder Motten noch rost fressen vund verzes-
ren / vnd da die diebe nicht nach graben noch stelen / vnd
teglich sterben vnd lernen / den es doch leslichen / heissen
wirdt: V. wer ist hie gewesen / sintemahl wir auch mit-
ten im leben sind / schon mit dem Todte vmbfangen.

Das macht aber Gottes Zorn das wir so vor-
gehen / vnnnd sein grim das wir so plözlich dahin mus-
sen / denn vnser missethat stellet er für sich / vnd vnser
vnerkante Sünde ins licht für seinem angesichte / Da-
rumb faren alle vnser tage so dahin / durch seinen
Zorn.

Dis elend kömpt von einem weibe her /
vnnnd vmb ihrent willen müssen wir alle sterben / Syr:
25. Solch sterben fenget sich fohrt von Mutterleibe
an mit vns / denn mit schmerzen vnd weinen kommen
wir auff Erden / In angst / Sorgen vnnnd traurigs-
keit füren wir vnser leben (wie denn ein vnglück allwege
dem andern die handt beut) in klagen vnnnd jammer-
schlagen enden wir vnser leben.

Das also des Menschen leben in der warheit kein
leben / Sondern ein lauter elende ist. vnd sonderlich
vnter andern allen werden zum heftigsten angegrif-
fen / die / so im Hause des Herren befunden werden /
wie denn das gericht vom Hause des Herrn allzeit an-
fenget / vnd die tragē vmb allzeit das sterben des Herrn
Jesu an ihrem leibe / auff das auch das leben des Herrn
Jesu an ihrem leibe Offenbar werde / vnd zwar sol-
te auch ein vnglück vom Himmel fallen / so müste es zu
forderst / die / so Gottselig in Christo Jesu leben wollen /
bressen / den die sind eben die elenden vnnnd trostlosen

2. Cor 4.

Rom. 8.

uber welche alle wetter gehen / Esa: 64. Es musste auch der Mensch in dem vielfeltigen vnglück vnnnd elend sterben vnnnd verderben / wo im nicht dieser trost wehr beygelegt / das diese trubsal zeitlich vnnnd leichte sey / vnnnd dieser zeit leiden mit nichten der herrligkeit wehrt / die an den Kindern Gottes sol offenbart werden / vnnnd das sie auch nichts scheiden könne von der liebe Gottes / die in Christo Jesu ist / weder trubsal oder angst / oder verfolgung / sindtemal alles ihr eigen ist das gegenwertige vnnnd zukünfftige / sie aber sein Christi vnnnd Christus ist Gottes / 1 Cor: 3.

In diesem Creutzorden / ist auch befunden worden / die numehr in Gott ruhende vnnnd selige Matron Ermgardt von Jagow / an welcher irdische Haus / des leibes / mit vngestüm der Todt vnnnd seine trabanten in die 52. jahr vnablessig gearbeitet / vnnnd nu mit aller gewalt in die 32. wochen daran gerissen / bis sie es lechlichen gar gefellet.

Rom. 12.

1. Theff. 4.

Dauon denn ihre liebe fromme vnnnd gehorsamste Kinder / neben andern Blutsfreunden vnd bekanten / wie billig / eine schmerkliche herken angst vnnnd trawrigkeit empfunden / vnnnd zum höchsten Darüber sind betrubet worden. Weil denn solchs nach dem willen Gottes geschehen: Als wol sichs ja gebüren / das auch wir ein herzliches mitleiden mit ihnen haben Weinen mit den weinenden / vnnnd traurig mit den traurigen sein / welches denn ihren schmerzen etlicher mas wird lindern. Damit sie aber ihre Seelen mit gedult fassen / die vielfeltige threnen messigen vnnnd denen ein ende geben / auch ihren willen brechen / vnd die Göttlichen allmacht vnnnd willen alles heimstellen mögen / vnnnd nicht trauren wie die andern die keine hoffnung

hoffnung haben / wollen wir zur lehre vnnnd trost den
Text des Heiligen Apostels Pauli 2. Cor : 4. vnd 5.
Für vns nemen / vnd diese beide stück kürzlich erkleren /
Als zum Ersten / wollen wir hören vom Creuz / trubs
sal vnnnd elend dieses betrübten lebens. Vnnnd zum
Andern / von dem mechtigen trost / vnnnd Schönen
wechsel / welchen wir dargegen haben / vnd wie solchs
mit gedult von vns Können gelitten vnnnd überwunden
werden / vnnnd wollen letztlich auch mit hinanhengen
vom Christlichen leben / vnnnd seligen abscheit aus die-
sem elendsthal dieser in Gott ruhender Matron / Gott
gebe seine gnade.

I. Locus :

Recht vnd wol singet die heilige Christliche
Kirche / Mitten wir im leben sind mit dem Tode
umbfangen / denn was sich nur inn vnd an vns
reget vnnnd beweget / das ist voller jammer vnnnd elend /
vñ sterben vnd vorderben henger vns teglich am halse /
welchs auch die Heiden erkandt / Darumb sie auch den
jammerlichen zustandt dieses elenden leben hauffens
weis beklagt / wie vntern andern Homerus sagt: Die
Erde Neere kein elender thier vnter allen / so darauff
gehen vnnnd Kriechen / als den Menschen.

Was aber für eine vrsache dieses grossen vns
glücks sey / das die Edle Creatur vnd geschöpffe Got-
tes / der Mensch / so grossem elende / vnglück / gefahr /
vnnnd letztlich den Todi selbs mus vnterworffen sein /
zeiget der Geistreiche vnnnd wunderman Gottes Moys-
ses an Psalm : 90

Das macht dein zorn das wir so vergehen / vnd
dein

dein grim / das wir so Vöcklich dahin müssen / denn an dir hab ich gesündigt / vnd vbel für dir gethan / singt der Königliche Psalmista Psal: 51. Solchs können die recht gläubigen Christen zum besten erkennen / quod nullum sit malum, quod non creauerit DEVS. Denn sie sich nicht vnschuldig haken / vnd keren vnnnd wenden sich zu dem der sie schlecht / da in gegentheil die so keine hoffnung haben / in ihrem elende verzagen vnnnd verschmachten.

Psalm: 23.

Psalm: 119.

Luce: 2.

Philipp: 1.

Job: 7.

Darumb sol im Creutz vnnnd elende vns dienen das trostreiche Göttliche wort / welches der dichte stecke vnnnd stap ist / Daran wir vns halten / weil wir in diesem trawrigen finsterthal wandern / ja wenn auch Gottes Wort nicht vnser trost wehre / so mussten wir in vnserm elende vergehen. Demnach sollen wir vns im Creuze vnnnd widerwillen (wie den auch in guten tagen) stedes des Todes erinnern / vnnnd desto zeitlicher mit diesem vnausbleibenden Gaste bekandt machen / auff das / wen er nu seine vorboten (Als franckheiten vnnnd ander elend) an vns schicket / biß er auch lechlich en selbst Hand an vns leget / wir mit dem lieben Simeon vnnnd S. Paulo in zu gaste laden mögen vnnnd sagen: Ich begere auffgelöset vnnnd bey Christo zu sein. Doch ehe er das garaus mit vns spielet / wirdt er vns hefftig zu setzen / das wir auch immerdar im streit werden sein müssen: vnnnd die mahlzeichen vnser Herrn Jesu Christi an vnserm Leibe tragen / vnnnd das ienige was noch mangelt an trubsaln in Christo / für seinen leib / welcher ist die gemeine an vnserm fleische erstaten helfen.

Vnd ob gleich die lieben Christen in diesem leben nicht auff Rosen gehen / Sondern dem ebenbilde
des

des Herrn Jesu Christi ganz ehnlich werden müssen/
so heists es doch: Unser trübsal die zeitlich vnnnd
Leichte ist etc.) vnser / nemlich der Christen trübsal/
den die lieben Christen müssen doch allwege vorne an
der spizen weil das gericht des Herrn von seinem ei- 1. Petri: 4.
gen Hause ansetzet / vnd die Ordensbrüder Jesu Christi
mit ihrem Herrn am Creuz stehen müssen / sintes-
mahl / weil sie Gott lieb sind / sie ohn anfechtung nicht Thob: 12.
sein können / die güte des Herrn aber ist / das wir
nicht gar aus sein / Vnd wenn vns der Herr Zebaoth
nicht liesse ein weiniges vberbleiben / so weren wir So- Thimoht. 3.
dom / vnnnd gleich wie Gomorra / Esa. 1.

Darumb heist es: Die zeitlich ist.) Es ist wol
groß jammer / lange leben / vnnnd lange in vnglück
schweben / vnnnd das sich Gott nirgens von vns wil
finden lassen / vnangesehen / Das wir einen boten vber
den andern (nemlich andechtiges gebet / sehnliche seuf-
zere / nebenst den willigen Almosen) zu im schicken
vnnnd senden / vnnnd mit Christo am Creuz stehen müs-
sen / vnnnd schreyen: Mein Gott / Mein Gott / was
rumb hastu mich verlassen? Das auch aller dinge kein
trost in vnser herze wil / vnnnd mit schrecklichen vnnnd
Teufflischen gedanken vberfallen werden / Wo nu-
der Gott sey / der da sage Esa: 65. Ehe sie ruffen wil
ich sie erhören / oder: Ruff mich an in der zeit der noht/
so wil ich dich erretten vnnnd du solt mich preisen / Psal:
50. So sol demnach dis vnser trost sein / wie S. Pauli.
hie sagt. Unser trübsal ist nur zeitlich / denn dieses
leben vnnnd zeit / welche an keinen Stecken gebunden/
ist vorgenglich / vnnnd wird bald ein ende nemen / Aber
der Gott aller Gnaden / der vns beruffen hat zu seiner
ewigen herrligkeit in Christo Jesu / derselbige wird vns
die wir eine Kleine zeit leiden / volbereiten / stercken/
D ij krefftigen



Errefftigen vnnnd gründen. Vnnnd es kömpt lechlichen
zeit vnnnd stunde / das es auß einem andern fassce gehen
wird.

Demnach / wer des Creuxherrn Jesu Ebristi
Diener sein wil / der mus sich auch jm zu ehren des
hertesten erwegen / vnnnd sein Creux auff sich nemen/
vnnnd in durch viel trubsal vnnnd verfolgung hernacher
wandern / vnnnd nicht allein viel genies / sondern auch
ein wenig vordries bey im suchen vnd austehen. Denn
er henget seinen liebhabern / vnnnd Bekennern einen
Schawgroschen am Halse / darauff gepreget steht:
Tribulatio & Angustia inuenerunt nos, Creux
vnnnd angst trifft vns / den müssen sie in zu ehren tra-
gen / vnnnd nicht mit dem lieben Job aus vngedult hera-
rausser fahren / Cap: 19. Factus est mihi crudelis, der
Herr handelt nicht mit mir nach Barmhertzigkeit.
Das ist der alte Adam / der rümpffet vnnnd windet
sich fürm Creuxe wie ein arme Made / ja wenn auch
noch das vnglück von ferne durch einen Zaun herblis-
cket / so wil er schon für vngedult aus der Haut faren/
vnnnd werffen also ihrer viel / aus vngedult / Christo
dem Herrn die schlüssel für die füsse.

Darumb ist auch gar vnehrstlich gehandelt / wenn
Psalm. 77. man spricht: Meine Seele wil sich nicht trösten las-
sen / vnnnd verfluchen also mit Job / Cap: 3. vnnnd Jere-
remia / Cap: 20. tag vnnnd stunde darin man geboren
ist / vnnnd lassens hernach alles vbers Heupt gehen/
vnd wollen mit sorgen Grämen alle ding schlecht vnd
recht machen / vnd ist doch nur eine vergebliche Plage
Dauon wir weder satt noch reich werden / vnd richten
nicht mehr damit aus / als das wir vnser elend vns
Doppelt machen / den zorn Gottes heuffen / vnnnd den
bittern.

bittern Tode desto zeitiger zu vns ziehen / sintemal
trawrigkeit viel Menschen Tödtet / vnnnd dienet doch
nirgent zu / Syr : 30. Vnd wenn wir gleich mit Gott
auffbinden / vnnnd einen Berg auff den andern tras
gen wollen / So wirds doch zu lest heissen / Durum eo
rit tibi contra stimulum calcitrare. Dann wir wiss
sen das im Hause des Herrn / vnd in dem Herken das
Gott fürchtet / sich der jammer erstlich anhebt / die müs
sen erstlich aus dem Kelche Gottes Trincken / vnd ein
diener Christi mus sich seines Hoffgewands / nem
lich des lieben Creuzes / nicht schemen / Er wird sich
sonsten seiner am Jüngsten tage wider schemen.

Vnnnd das Creuze ist das rechte heilthumb /
dessen die Christen viel weniger / denn des teglichen
Brots / entraten können. Psalm : 119. Es ist mir lieb
Herr / das du mich gedemütiget hast / auff das ich
deine rechte lerne. Denn auffer dem Creuze sind
wir zu allen guten kalt vnnnd vntüchtig / nemen vns des
Gebets nicht mit ernst an / Verlassen vns auff Men
schen vnnnd irdischer hülffe / lassen vns auch Träumen
wir sind gar gute Christen. Wens aber ans tref
fen gehet / vnnnd Gott durch das Creuze vnsern Glau
ben / geduld vnnnd beständigkeit beweren wil / vnnnd
sehen was wir im Schilde führen / so lassen wir Hende
vnd fusse sincken / denn Fleisch vnnnd Blut schewet aus
der massen sehr das Creuze / vnnnd ist der Teuffel hie
ein rechter Meister darzu / der gerne vber den Zaun
steiget da er am niedrigsten ist / das er mit schrecklicher
anfechtung zu schüret : Ey wie ein feiner Christe bis
stu / du hettest wol Tausent Eyde darauff geschworen /
Gott were dein lieber Vater / Jesus Christus dein
getreuer Bruder / der heilige Geist dein vnuorschied
licher gefehrte / nu stehstu wie du stehest / vnnnd steckest
B III wie.

wie du steckst / Gott wil deiner keine Gnade haben/
ach er hatt vorgessen gnedig zu sein/er hat seine Barm-
herzigkeit für Zorn gar verschlossen/er ist des erbarm-
mens müde / wie er Jer: 15. saget / Ja alle Creatur
sehen dich traurig an / vnd kündigen dir Gottes hülfe
se ab.

Das ist denn auch ein groß jammer / wenn wir
so hoch betrübt werden / das vns ein stücke vom her-
zen/wegen Tödllichen abgans vnser lieben freunden/
gerissen wird/das wir ihrer freundlichen beywohnung
vnd lieblichen gesprech müssen beraubt sein / vnd
sich ihrer /bis zum Jüngsten tage / vorzeihen / O.
wie manche heisse threnen werden daruber vergossen/
wie schmerzlich vnd bitterlich wehe thuts vns / vnd
sonderlich frommen vnd gehorsamen Kindern / ist
ein scharff zweischneidendes schwert / welches ihnen
durch Herz vnd Seele dringet / wenn sie ihrer lies-
ben Eltern / die für grosser liebe vnd trew / ihnen das
herze im leibe wol mit getheilet hetten / so schendli-
chen / in diesem leben / müssen beraubt sein/das sie Sie
auch / wo es Menschlich vnd möglich / mit Nägeln
aus der Erden widerumb krateten.

Thess: 4.

So sol man dennoch maß halten im trawren/
vnd das wirs nicht auff Heidnischer ahrt / die keine
hoffnung haben / machen / vnd die regul Syrach
Cap: 38. nit überschreiten / do er spricht: Mein
Kind / wenn einer stirbt / so Beweine in/ vnd klage in/
als sey dir groß leid geschehen / vnd verhülle seinen
Leib gebürlicher weise / vnd bestate in ehrlich zum
Grabe / du solt bitterlich weinen / vnd herzlich be-
trübt sein / vnd leide tragen / darnach er gewesen ist/
Zum wenigsten ein tagt oder zween / auff das man
nicht

nicht vbel von dir reden möge / vñnd tröste dich auch
wider / das du auch nicht Traurig werdest / denn von
trauren kompt der Todt / vñnd des herzen Traurige
keit schwachet die krefte.

Darumb sollen wir vns selbst nicht viel Plage
vñnd vnruhe machen / auff das wir nicht aus Christi
Creuz vñnd ordens Brüder / des Teuffels Mertyrer
werden. Zwar das trawren vñnd Weinen ist durch
aus nicht verboten / weil Christo dem lieben Herrn
selbs / seine heilige threnen / die Backen herab fliessen /
da er weinet vber Jerusalem wie ein Kindt / Lu: 19.
Item / da er Lazarum seinen lieben freuntt beweinet
Joan: 11. vñnd am Creuz vergeust er auch manch
sehnlich augenwasser Ebr: 5. Viel weniger ist vns
zuuordencken / denn / Homines sumus, vñnd wir armen
Würme haben doch keine bessere Trostspeise den seüf-
zen vñnd wehklagen / welchs die zwee scherfflein sind /
die von der elenden widwe / vñnd hochbetrübtten Kirche
in Gottes Kasten gelegt werden / wie D. Hieronimus
sein sagt / vñnd diese grosse ruffere stürmen den Him-
mel / vñnd bringens Gotte so nahe / das er drein sehen
mus.

Es ist auch solch weinen nicht newe / sintemal
die Heiligen Gottes / die ihren rechte Kleglich vñnd
sehnlich beweinet vñnd beklagt haben / Gleich wie der
Erzvater Abraham Gen: 23. seine heußliche Saran
Die Kinder Israel / ihren holdseligen vñnd freundlichen
en lieben Vatern Jacob Gen: 50. vñnd der könig Da-
uid 2. Sam: 18. seines vngeraten Sons Absolons
vntergang beweinet. Denn es freilich durchs herze
vñnd vber Augen gehet / wenn man die seinen ents-
peren mus / vñnd zwar auch / je heffziger vñnd gros-



ser die natürliche Blutsiebe im Menschen ist / se che
vnd mehr er zum mitleiden / vnd weinen bewogen
wird / doch mas ist zu allen dingen gut / das man der
sachen auch nicht zuviel thu.

Vnd Leichte ist.) Es lest sich mancher bes
dünnen / sein leiden sey vber alles leiden / vnd siße
selbender nur ins Teuffels Sieb / ihme alleine liege
auch die schreckliche Bürde vnd Last des schweren
vnd vntreglichen Zorns Gottes / vnd der straffe
auffen Halse / da sollen wir nu zu rücke gedennen das
vns trübsal leichte vnd ertreglich ist / Darumb das
es vns nicht gar biß an die Seele gehet / vnd nicht
mit S. Paulo des Sathans schlege leiden vnd fülen
dürffen / vnd ob wir gleich damit getroffen würden /
so ist es doch das Tausende theil / ja mit alle nicht zu
uorgleichen mit dem Leiden des vnschuldigen Gottes
Sons Jesu Christi / vmb frembder Sünde willen /
dem wir so viel vnd grosse mühe vnd arbeit gemache
mit vnsern Sünden / das er lezlichen auch so erberm
lichen zu Gott seinem Himlischen Vater geschrien /
vnd geruffen: Mein Gott / Mein Gott / warumb
hastu mich vorlassen? Vnd wenn gleich mitten im
Tode vns ansicht der Hellen Rachen / ja auch recht
mitten in der Hellen angst / vnser Sünde vns treis
ben (wie denn die Gottseligen auch vmb ihrer Sünde
willen / ihre Helle auff dieser Erden haben) so wissen
wir dennoch zu wem wir sollen fliehen / vnd wer
vns aus dieser hohen noht / frey vnd ledig sol machen /
nemlich der Herr Jesus alleine / vorgossen ist sein teü
res Blut / das gnug für die Sünde thut.

Denn

Denn er hat die schwere last vnnnd Bürde von
vns genommen vnd auff sich gehockt / denn Dorn aus
vnsern füßen gezogen / vnnnd sich selbs wider eingest
steckt / vnnnd vns mehr mit einer kleinen leichten vnnnd
zeitlichen Bürde belestiget / welchs doch in der warheit /
gegen seinem leiden / vnnnd auch gegen dem / das wir
von wegen vnser Sünde ewiglich hetten tragen sollen /
kein leiden oder Creuz / sondern nur lauter liebstreich /
gnade vnd Vaters Ruthe ist.

Leichte ist auch vnser Creuz / Darumb das wir
in vnserm elende nicht allein leiden durffen / sondern
die ganze Brüderschafft / ja das Heupt der Christen
heit Jesus Christus selbst leidet mit vnd in vns / Gleich
wie es nu der ganze Menschliche Körper empfindet /
wenn ein Glied was beschedigt oder verlegt ist / nur das
die fühlung etwas hefftiger vnnnd mehr im vorletzten
gliede ist / denn in den andern / dennoch empfindets
der ganze leib : Also trauret die ganze Brüderschafft
auch mit vns / vnnnd wie nu viel Hende leichte arbeit
machen / also kan vns auch das mit leiden des Heupts
vnnnd anderer gliedmassen der Christlichen Kirchen /
vns viel traurens vnnnd klagens benemen.

Ferner so können wir vnser Creuz auch leicht
lich dulden vnnnd tragen / weil wir wissen / das wir
weder die ersten noch die letzten sein / vnnnd es haben
auch die Heiligen Gottes groß Creuz vnnnd elend ge
habt / wie die Heilige schrift / nebenst andern Bäch
ern / vielfeltigen bezeuget / vnnnd ist demnach das vns
ser ein arm vnnnd geringe Creuze / gegen dem ihren /
vnnnd letzten ist es auch leicht / weil es nur zeitlich
vnnnd

vnd dis leben nur allein betrifft / Darumb singet die Kirche: Ist dir das Creuze bitter vnd Schwer / so gedencke wie Heis die Helle wehr / darin die Welt thut rennen / mit Leib vnd Seele mus leiden sein / ohn vnterlas die ewige Pein / vnd mag doch nicht Vorbrennen.

Prou: 3.

Darumb D. wie selig ist der Mensch / den Gott züchtiget auff dieser Erden / denn er züchtiget noch die Sone nur / welche er lieb hat / Darumb weigere sich ja niemandt der züchtigung des Herren **Exre: 12.**

1. Cor: 10.

Schaffet eine ewige vnd **U**bermaß wichtige Herrlichkeit) Denn so mehr Creuz wir haben / so lieber wir Gott sind / vnd der handelt so trew bey vns / das er vns vber vormögen nicht wil aufflegen vnd versuchen lassen / sondern schaffet das es ein solch ende gewinne / das wirs ertragen können. Vnd sezt der heilig Apostel Paulus gegen der zeitlichen trübsal die ewige herrlichkeit / vnd gegen der leichten trübsal / die vbermaß wichtige herrlichkeit / wie er auch am andern ohrt saget: Ich halte es dafür / das dieser zeit leiden / der herrlichkeit nicht weert sei / die an vns sol offenbaret werden.

Rom: 8.

Welt liebenden vnd sichern Menschen / thut es bitterlich wehe / wenn sie dis zeitliche begeben sollen / vnd ein Plöcklicher vnfall sie vberreilet / ehe sie sich versehen / wie Syrach Cap: 14. spricht: O Tode wie bitter bistu / wenn an dich gedencke ein Mensch / der gute tage vnd gnug hatt / vnd ohne sorge lebet vnd dem es wol gehet in allen dingen / vnd noch wol

wol essen mag/aber / malum omen, wo es so zugehet/
vnd ist die vormutung da / das solche Gesellen / we-
nig sich werden vmb Gott / vnd das ewige Gut bes-
kummern / auch ihr guts hier in diesem leben emp-
fangen haben / vnd heist mit ihnen zu leste: Vitaq.
cum gemitu fugit indignata sub umbras, vnd
müssen hernacher mit allen Hellischen Gewen die
grundsuppe vnd Hesen / des schrecklichen vnd im-
mer vnd ewig wehrendenn zorns Gottes / gar auf-
sauffen. Da im gegentheil die Creuz brüder
Christi / in diesem leben mit ihrem Herrn / aus dem
Zorn Becher (welchen sie doch nerlichen nur kosten)
Trincken vnd rühmen sich noch der trübsal in Chris-
sto / vnd sagen noch danck dazu / das Gott sie so wehre
geachtet / vmb seines Namens willen schmach zu lei-
den / vnd können alles fein mit gedult vberwinden/
vnd trösten sich mit dem gedültigen Job Cap: 19.
Das ihr erlöser lebet. etc. Vnd sehnen sich nach
ihrer erlösung / vnd warten des Heilandes Jesu Chri: Philip: 3.
sti / der ihren nichtigen Leib vorkleren wird / das er
ehnlich werde seinem vorklerten Leibe.

Diesen ist der greßliche Bote / der nach dem wils-
len vnd beuehl Gottes / aus diesem Leben vns ab-
fordert / ein lieber vnd angenemer Gast / wie Eys-
rach auch sagt: O. Todt, wie wol thustu dem durfs-
tigen der da schwach vnd alt ist / der in allen sorgen
stecket / vnd nichts bessers zu hoffen vnd zu gewarten
hatt. Denn sie wissen das der Todt ihr gewin Philip: 1.
ist / weil Christus ihre leben ist / vnd sind gerecht-
fertiget von der Sünden / vnd ob sie auch gleich Rom: 6.
zu zeitig von dieser Erden gerafft werden / so kommen Cap: 4.

Cap: 3.

Apo: 7.

sie doch zur ruhe / vnnnd ihre Seelen kommen in Gottes Handt / da sie keine Quall anrüren wird / da auch hinfohrt kein Angst noch Leiden / weder noht noch Todt sie Plagen wird / Sondern Gott wird die thresnen / von ihrem Angesichte abwischen / freude vnnnd wonne / welche kein Auge gesehen / kein Ohre gehöret / noch in keines Menschen herze kommen ist / vnnnd Gott ihnen bereitet hat / wird sie umbfahen.

Auff diese Botschafft warten nu alle Christgleübigen vnnnd vielgeplagte Kinder Gottes / mit stedigem vnnnd herzlichem vorlangen / vnnnd wolten gerne schier / ihren Herrn vnnnd Heiland in seiner Maiestat anschawen / vnnnd ihres jammers vnnnd eslents vollendt durch ihn queid vnnnd loß werden / wenn hergegen die bösen vnnnd unbekerlichen Welckinder / ihr lebenlang nicht eines recht an solche Citationgedencken / sonst würden sie sich gewißlich mit vngeduldeten Sünden so lange nicht schleppen / noch so muhtwillig bey ihren vorkehrten sinn vnnnd Gottlosen wesen beharren.

Wollen derwegen in allen vorstehenden nöten leibes vnnnd der Seelen / sonderlich aber wenn vns der bittere Todt angehet / vnnnd durch alle vnser glieder mit vnaufsprechlichen schmerzen dringet / zu vnserm hülfreichen Herrn / vnnnd Bruder Christo Jesu eilen / welcher / Todt / Sünd / Teuffel / Leben / vnnnd Gnadt / alles in seinen henden hat vnnnd kan erretten / alle die zu im tretten / so wird vns der würgen nicht rüren.

Solchs getrösten wir vns die wir nicht sehen auff das sichtbare / sondern auff das vnsichtbare

sichtbare) Die Welt sagt: malum retinere in
praesentia quod est, ich behielte wol diß gegenwertig
ge / vnd liesse Gott seinen Himmel / denn ich weis wol
wo ich bin / aber wo ich hinfaren werde / ist mir vnbe-
wust / vnnnd bleiben im vorkehrten vnd zerrütten sinn
also dahin / vnd hoffen auffß vngewisse / dessen sie doch
kein Augenblick sicher sein. Dannenher denn ihnen
kein grösser herkleide widerfaren kan / als wenn es mit
ihnen / vnnnd dem zeitliche gute / an ein scheiden gehen
soll. Da ist denn Heülen vnnnd weheklagen / kleg-
lichs winseln vnnnd jammerschlagen.

Weil es aber noch in guter ruhe / stillstandt vnd
freundschaft mit ihnen ist / so achten sie weder Gots
tes / noch des ewigen guts / vorsehen sich auch mehr
heils vnd guts zum zeitlichen / denn zu Gott / ja sie
verlassen sich auch auff Menschen / die doch weiniger
denn nichts wegen / vnnnd sterblich da zu sind. O.
wie vnfreundlich handelt denn da der Todt / das er
solche grosse freundschaft sondert vnnnd trennet / vnd
wil sich aller ding nichts kehren / an ihrem vielfelti-
gen heulen vnnnd erbermlichen weinen / O. jammer
vnnnd noht / O. du elender bitter Todt / wie betrü-
bestu so manches herze.

Aber es sol nicht anders ergehen / denen die ihre
hoffnung setzen auff den vngewissen reichthumb dieser
Welt / vnnnd nicht auff den lebendigen Gott. Vors-
flucht muß demnach sein das elende gut / darauff des
Menschen herze sich vorlest / verflucht vnnnd vorma-
ledetet muß alle die freundschaft sein / die vns von
Gott abreisset / vnnnd auff Menschen heisset trawen
vnd bawen. Was hülffe es dem Menschen / wenn

Matt: 6.



Rom: 8.

Prov: 10.

er auch aller welt gut hette / vñnd solte schaden an seiner armen Seelen nemen? Was hilfft doch wol aller freundschaft / wem Gott nicht wol wil / vñnd dem Gott feindselig ist (denn fleischlich gesinnet sein ist eine feindschaft wider Gott). Darumb mit dem lieben David gebeten Psalm: 73. HErr wenn ich nur dich habe / so frage ich nichts nach Himmel vñnd Erden. Gelt vñnd gut ist eine gabe vñnd segen Gottes / solches sollen vñnd wollen wir gebrauchen als ob wirs nicht hetten / vñnd wollen vnser herke sein lassen / da vnser hochster schatz Jesus Christus mit allen seinen vñnd vnsern Gütern ist. Denn das zeitliche mus alles vorschwinden / vñd hilfft auch nicht wider ein Zanckwehe / aber das ewige gut macht rechten muht. Also auch sollen wir ehren vñnd Meeren Vater vñnd Mutter / Brüder vñnd Schwestern / Weib vñnd Kindt / vñnd dieselben / nach Gottes gebot / lieb vñnd wehre haben:

Aber der liebste vñnd beste freunde / sey vñnd bleibe ja Christus alleine. Denn wenn vns alle Welt verlest / so ist / vñnd bleibt er getrew / in vnser höchsten angst vñnd Todtes noht / setzen die andern alle von vns / vñnd können nicht mehr denn vns nach weinen (vñnd da wird sich der Todt doch wenig anferen) aber der getrewe HErr / ist bey vns in der noht vñnd reißt vns heraus / vñnd macht vns zu ehren. Darumb vorzeihe dich des sichtbarn / vñnd der freundschaft dieser Welt / damit du nicht mit Gott in ein schaff geretst / denn wer Vater vñnd Mutter / etc. lieber hat denn mich / sagt Christus Matt: 10. Der ist meiner nicht wehr. Vñnd wo du Gott zum feinde hast

hast / so feindet dich auch alles an / was im Himmel
vnd auff Erden ist / vnd dienen dir alle Creaturen
mit vnwillen. Darumb nimpt vns auch vnser
H. Erre. Gott solche trawten freunde / das wir vns zu
ihnen keren vnd wenden sollen / denn es heist: Als
lein. mein oder las es ganz vnd gar sein / der liebe
Gott kan keine neben Götter / da sich die Menschliche
herzen auff vorlassen / leiden.

Denn was sichtbar ist / das ist zeitlich /
was aber unsichtbar ist / das ist ewig) Alles was
ist auff dieser Welt / es sey freundschaft oder Gelt/
Reichthumb vnd zeitlich gut / das wehret nur eine
kleine zeit / vnd hilfft doch nichts zur seligkeit. Noch
sind die Menschliche herzen so hart darauff vorpicht /
das auch ihrer viel vmb des schñöden zeitlichen
guts willen / sich des ewigen vorzeihen / denn als
ler Welt sinn vnd muht / stehet immer nach Gelt
vnd gut / vnd wenn sie es nun erwerben / so legen
sie sich nider vnd Sterben / O. der grossen blind-
heit vnd thorheit / wie schendilich lest sich die Welt
betriegen / vnd auffsetzen. Denn was sichtbar ist
das ist zeitlich / vnd wehret es gleich Zwanzig/
Dreissig oder 40. jahr / so hats doch zulezt ein ende /
vnd folget die ewigkeit also fohrt darauff.

Also auch / aller Welt trost vnd hülffe ist vor-
genglich / ja wir selbs / was diß leben anlanget /
Vitæq; mancipio nulli datur, omnibus vsu. Das
rumb sollen wir vns vmb das sichtbare nicht so hoch
bekümmern / das wir nicht das unsichtbare vnd ewig-
ge / ja eins mit dem andern / verlieren / was hin ist /
vnd ich nicht endern magt / da kere mir Gott den

Job: 1.

finn ab. Ich habe gute freunde an die meinen ge-
habt / ich habe sie verloren / der HErr hats gegeben/
der HErr hats genommen / der Nam des Herrn sey
gebenedeyet in ewigkeit / ich warte nu auch auff Got-
tes heil / & de meo nunc luditur corio nu gilts
vmb mich / vnnnd schicken mich auch mit allem fleis/
denn der Todt kumpt vns gleicher weis. Wie sich
denn auch noch die beide vortraweten freunde / mein
leib vnnnd Seele nach den willen Gottes scheiden müs-
sen / vnnnd mus / ob ichs gleich mit vnwillen thu / noch
darin zu frieden geben / wenn der langscheinichte /
holleugichte / vnnnd stumpfnasichte gelbe Todt / seine
grestliche Klawen mir ansetzen wird / vnnnd mit vn-
barmherzigkeit die freundschaft vnnnd beywohnung
leibes vnnnd der Seelen / trennen / warumb wolte ich
mich denn zu Todte mergeln vnnnd gremen vmb eines
andern willen ? Vnnnd sonderlich weil ich weis/
das er vnuorloren vnnnd er nur vorhin ist / vnnnd wird
vns nicht mehr folgen / sondern wir müssen ihm fol-
gen / denn metam properamus ad vnam.

Du sagst aber / das du deinen verstorbenen freund
so sehr nicht beweinest (sintemal im wol ist) als dein
eigen vnglück / das dich nu treffen wird / denn du hats
test ja noch einen Ruckenthaler vnnnd Menschlichen
trost an in / vnnnd weist / wie es in der Welt pflegt zu-
zugehen: Donec eris felix multos numerabis a-
micos, Tempora si fuerint nubila, solus eris Da
gedencke nu wider an die wort S. Pauli / das solchs
auch zeitlich vnnnd vorgenglich ist / vnnnd Gott wird es
wenden zum seligen ende / Es kan dir doch nichts an-
ders ergehen / denn Gott wil / wenn gleich alle deine
freunde

freunde noch lebten. Darumb laß Gott deinen Vater
vnd vormunde sein / der sich der Waisen Vater /
vnd der Widwen Richter zu sein versprochen. Ein
Christ sol nicht vorzagen weñ im gleich alle Creatur
vorsagen / er sol seine noht dem Herr Christo klage / der
kan allem vnfal wehren / kein leid sol vns widerfaren /
er sorget für vns der Barmherzige vnd gnedige Herr 2. Pet: 2.
er weis die Gottseligen aus der vorsuchung zu erlösen /
die vngerechten aber zu behalten zum tage des gerichts
zu peinigen. Vnd gedencke das du Gott viel zu lieb
darzu bist / das er sich dein nicht annemen solte / Dar-
rumb wenn es kompt: Noti & amici mei steterunt a
longe, so getröste dich: der Herre ist nahe / sorget
nicht / Vater vnd Mutter verlassen mich / aber der
Herr nimpt mich auff.

II. Locus.

Wir wissen das so vnser irdisch Haus / die-
ser Hütten zerbrochen wird) Es ist zwar
ein erbermlich ding / das die Edle Creatur Gottes /
der Mensch / daran Gott seine höchste kunst vnd
Allmacht gewandt / so elendiglich / mit schmerzen vnd
threnen / von hinnen fahren / vnd mit seüßzen die
Welt gesegnen mus / wie er denn mit gleichem elend
darauff kommen: So wissen wir nu im gegentheil /
das diß irdische Haus dieses Körpers / in vorweß- 1. Cor: 15.
ligkeit vnd vnehre nur geseet wird / aber in vnuor-
weßligkeit vnd ehre wider herfur kommen werde /
vnd singet die Kirche. Wenn ich gleich sterbe /
so sterbe ich dir / ein ewiges leben hast du mir / mit deis-
nem Tode erworben / denn der Christen Tode ist ein
Ohrebandt / ja ein ende aller angst vnd noht / denn
selig

selig sind die im H. Erren sterben / sagt die Stimme vom
Himmel / von nu an ruhen sie von ihrer Arbeit /
Apo: 14.

Darumb breche vnnnd reisse mit allen seinen
Tagelöhnern der grimmige würger vnd Leütffresser der
bittere Todt / an diesem gebrechlichen Hause / biß
ers mit alle felle / vnnnd zu Boden Kriege / so ist doch
nichts daran verloren / denn es kompt die stunde / in
welche alle die in denn Grubern sind / werden seine /
des Menschen Sons / Stimme hören / vnnnd wer
den herfür gehen / die da guts gethan haben zu der
aufferstehung / des lebens / die aber vbelts gethan / zu
der aufferstehung des gerichtts Johan: 5. Vnnnd
siehe / sagt Gott / Ezechiel: 37. Ich wil ewre Gres
ter auffthun / vnnnd wil euch mein Volck / aus den
selbigen herauffser holen.

Apo: 7.

Da wird denn vnser nichtige leib / dem vorklars
ten leibe Christi ehlich werden / vnnnd wird die sterbs
ligkeit die vnsterblichkeit / die schande die Ehre / die
schwacheit die stercke / das natürliche das Geistliche
anziehen / 1. Corrint: 15. Vnnnd der Herr wird die
trenen von allen Angesichten abwischen / vnnnd wird
auffheben die schmach seines Volcks / in allen Lans
den / denn der H. Erre hats gesaget / zu der zeit wird
man sagen / Siehe das ist vnser Gott / auff den wir
harren / vnnnd er wird vns helfen / Esaias: 25.

1. Cor: 2.

Wir wissen) Der natürliche Mensch ver
nimbt das nicht was des Geistes ist / es ist für im eine
thorheit / Fleisch vnnnd Blut offenbaret vns das vns
borgene geheimnis nicht / das vmb hat die Welt /
manus Oculatas, credunt quod vident, vnnnd
vorachten

verachten den Artikel von der auferstehung der Todten / wie Cornelius Gallus schreibet: Et redit in nihilum quod fuit ante nihil, vnnnd Plinius sagt: Die Sonne gehet auff vnnnd nieder / aber wenn der Mensch ein mahl stirbt / so bleibt er Todt.

Wir Christen aber wissen / das der Allmechtige Gott / dem ruffen kan / das nichts ist / das es etwas sey / denn im nichts vnmüglich ist / vnnnd alles Psal: 115. schaffen kan was er wil im Himmel vnnnd auff Erden. Darumb sagen wir mit dem lieben Job: Cappittel: 19. Ich weis das mein erlöser lebet / vnnnd er wird mich hernach aus der Erden auferwecken / vnnnd werde darnach mit dieser meiner Haut vmbgeben werden vnnnd werde in meinem fleisch Gott sehen / denselben werde ich mir sehen / vnnnd meine Augen werden ihre schawen / vnnnd kein frembder.

Ob gleich die Gottlose Welt solchs vorspottet / vnnnd nicht glöuben wil / solte ihre vnglanbe darumb Gottes glauben auffheben? das sey ferne. Vnnnd sol vnnnd mus gleichwol heissen: Deine Todten werden leben / vnnnd mit den Leichnam auferstehen / wacht auff vnnnd rühmet / die ihr ligt vnter der Erden Esaiä: 26. vnnnd der Herr selbs wird mit einem Feldgeschrey vnnnd stimme des ErzEngels / vnnnd mit der Posaunen Gottes ernider kommen vom Himmel / vnnnd die Todten in Christo werden auferstehen zu erst etc. 1 Thessoloniern: 4. vnd der letzte Feindt / der Todt / wird aufgehoben werden. Denn solten wir allein in diesem leben auff Christum hoffen / so wren wir ja die elendisten vnder allen Creaturen.

D ij

Aber

Aber wie wir in Adam alle sterben: Also werden wir in Christo alle lebendig gemacht werden / 1. Cor: 15.

Dieser hütten zerbrochen wird) Pallida mors æquo pulsat pede, Pauperum tabernas Regumq; turres, wir müssen alle an den Keyen / vnd wenn der leib noch so Edel / junck / schön / vnd starck ist / so ist er dennoch der eitelkeit vnd vorweßligkeit vnterworffen. Darumb so oft du eines Todten Kopffs oder Gebeins / ansichtig wirst / so gedencck das dein Kopff vnd gebeine gleiche gestalt bekommen werden / vnd sie dir solchs erinnern: Vos qui transitis, Nostri memores modó sitis, Quod sumus, hoc eritis, fuimus quandoq; quod estis:

Alle die ihr hie füruber geht/
Schawt wie die sache mit vns ist steht/
Was wir jzt sind / das werd ihr werden/
Was ihr jzt seid / warn wir auff Erden.

Vnd ist auch weiniger denn nichts zu erkennen wer Edel oder vnedel vnter sie gewesen / so jemmerlichen wird diese jrdische Hütte zerbrochen / das sie hinsohrt auch mehr nicht zuerkennen. Aber wenn sich Christus vnser leben offenbaren wird / vnd die seinen welche im Gott sein Himlischer Vater zum erbe vnd eigenthumb gegeben / mit seiner stimme aufferwecken wird / so werden wir ein jglicher mit seiner selbst eigen Haut vnd Knochen wider vmbgeben vnd angethan werden / vnd sol kein Haar / ja kein Klawe aller dinge

Dinge dahinden bleiben / vnd werden also dem Herrn
entgegen gezückt werden in der lufft / vnnnd bey dem
H. Erren sein allzeit.

Das wir haben einen Baw von Gott er-
bawet / nicht mit Henden gemacht) Es werden
vnser leibe hinführt nicht so elendt / schwach / vnnnd
mancherley plage vnnnd gefahr vnterworffen sein /
denn wie wir getragen haben das Bilde des irdischen / 1. Cor: 15.
also werden wir auch tragen das Bilde des Himlischen
vnnnd gleich wie man an ein alt Haus viel bawet vnnnd
sicket / vnnnd auff's lengest / als man kan auffhelt /
So mus es dennoch zu letzte denn letzten bruch bres-
chen / vnd vbereinander fallen: Also / wenn gleich
die Medici, viel sicken vnnnd lappen an vnsern leiben /
vnnnd haltens / / durch Gottes willen / ein zeitlang
auff / so kans doch in die lenge keinen bestant haben /
denn wenn die Hüter im Hause / das ist / die Hende
zittern werden / vnnnd sich krümmen / die starcken /
das ist / die beine / vnnnd müßig stehen die Müller z
zeene / das ihr so wenig worden ist / vnnnd finster wer-
den die gesichte durch die Fenster / die Haar grow /
vnnnd die schuldern sich bücken / die Ohren hengen vnd
daub werden etc. so heists denn der Staub mus wis-
der zur Erde kommen / wie er gewesen ist / vnnnd der
Geist wider zu Gott der in gemacht hat / Eccle: 12.

Vnd / kein frucht das weissen kornlein bringt /
es fall denn / in die Erden / also mus vnser irdisch leib /
zu Staub vnd Aschen werden. Wie mann aber die
alten eingefallenen Heuser vngewawt nicht liegen lest /
besondern newe an derer start widerumb auffbawet.

D

iii

Also

Also wird auch der liebe Gott seine Seelen / die er
theur gekaufft nicht lehr vnnnd blos ohne leiber in ewigs
keit lassen befunden werden / sondern wird die Exu-
uias animarum & Spiritus Sancti wider heis für hos-
len vnnnd auffbawen / vnnnd ewiglich seine lust vnnnd
freude daran haben.

Das ewig ist im Himmel) Solche neue
beysamem wohnung / leibes vnnnd der Seelen / sol
vnnzertrenlich sein / da werden denn die Gottfürchtis-
gen / das gut des HErrn / im lande der lebendigen
sehen / vnnnd werden leuchten wie Sonn / vnd Mond /
vnnnd wie Sterne des firmaments immer vnnnd ewigs
lich / vnnnd werden die Krone der gerechtigkeit / die
ihnen beygelegt ist / von dem gerechten Richter Jesu
Christo / bekommen / wo ferne sie die zukünfft Christi
lieb haben / vnnnd werden Essen vnnnd Trincken mit
Abraham / Isaac vnnnd Jacob vber der königlichen
Himlischen Taffel Matt: 8.

Darauff vertröstet er vns selbs der HErrre Jesu
sus Joan: 14. Er habe vns eine wohnung / Him-
lische Bürgerschaft / vnnnd ewige bleibende stete / bey
Gott seinem Himlischen Vater erworben / da wird
Christus den Todt ewiglich vorschlingen vnnnd vns
sere schwach auff heben / all vnser leid wird in ewige
freude / die niemandt von vns nemen wird / verwans-
delt werden / da wird freude die fülle / vnnnd ein liebs-
lichs wesen zu seiner rechten sein ewiglich / vnnnd wer-
den der vorigen nicht mehr gedenccken / vnnnd es wird
nicht mehr darinne gehört werden die stimme des
klagens. Solches alles kan weder mit glaube / hoff-
nung

Psal: 27.

Rom: 12.

2. Thim: 4.

Apo: 7.

2 2 1.

Psal: 16.

nung oder liebe begriffen werden / denn das kein aüg
gesehen / kein Ohre gehört / vnd in keines Menschen
herke kommen ist / das hat Gott bereitet / denen die
ihn lieben 1. Cor: 2. Denn da werden sie mit vnausspre-
chlicher freude sich frewē / das sie stedes vbersich mit
vnaffhörlicher lust die vnendliche Göttliche Maiestat
anzuschawen haben / vnd vntersich / haben sie sich zu
frewen der entfreyung vnd erledigung aus der schreck-
lichen Grube vnnnd hōle / darinne kein labfalbe ist / der Sach: 9.
betrübtten Helle. Ja in sich selbst werden sie freude
haben / wegen ihrer herrlichen / Clarificirten vnd hels-
leuchtenden leiber vnnnd Seelen. Vmb vnnnd neben
sich haben sie sich zufrewen / der lieblichen vnd schönen
gesellschaft der lieben heiligen Engeln / vnnnd aller
anßerwelten Gottes heiligen / wie der Altvater D.
Augustinus saget / Eya wehren wir da.

Hiernach wollen wir vns sehnen / vnnnd warten
auff vnser leibes erlösung / das wir mögen hinzuges-
chan werden / zu der gemeinschaft der lieben heiligen
Engeln / aller heiligen Patriarchen / Propheten / Ap-
posteln vnnnd lieben Kerterern / auch vnsern herzaller-
liebsten Voreltern / Eltern / Kindern / Mens-
nern / Weibern vnnnd allerbekanten vnnnd bes-
freunten / vnd die Vollkommene freude /
Wonne vnnnd Herrlig-
ewig besitzen.

A M E N.

S iij

Also

Also hat auch die mahlzeichen
Jesu Christi / an ihrem leibe getragen die
Edle Ehrenreiche vnd vieltugentsame Ma-
tron Ermgardt von Zagow / derer Seelen
Gott in ewigkeit gnade / denn weil sie auch Gott
lieb war / so hat sie auch ohn Kreuz vnd an-
fechtung nicht sein können / sintemahl sie Gott
weidlich durch den Kreuzosen gezogen / nicht
allein in dem / das sie ihrer lieben Eltern gar
zeitig / auch ihrer lieben seligen vnd in Gott
ruhenden Ehmans vnd Kinderlein (welchs
jhr denn / wie zuerkennen / ein schmerzlicher
angst gewesen) ist beraubt worden :

Besondern auch das sie Gott an ihrem ei-
gen leibe hefftiglich mit viel sorge / kummernis
vnd elend angegriffen / vnd jhr dis zeitliche
leben also erleidiget vnd müde gemacht / das sie
offt mit S. Paulo gebeten : Ich begere auff
gelöst / vnd bey meinem HErrn Jesu Christo
zu sein.

Also ist sie zwar ein Ermergardte / der viel
schlaggen / Regen / Schnee vnd Frost (das
ist mancherley unglück vnd elende) unterworff-
fen / gewesen / wie denn jhre nahm Teutscher abht
nach

nach zu reden / in seiner bedeutung fast sich an-
sehen lest / als solt er deriuation (wiewol es
nicht Propria & genuina sein mag / welchs ich
Denn in seiner würde lasse) daher haben. So
ist dennoch der Edle Samen des heiligen Gött-
lichen Worts / in ihrem hertzen so tieff vnterge-
graben / vnnnd mit Gottseliger andacht vnterge-
eget gewesen / das er von so vielen vnnnd man-
cherley vngewittern vnnnd elenden / nicht hat
können beschediget werden / ja auch diegrau-
same hitze / der Innerlichen vnnnd Eusserli-
chen anfechtungen / haben ihn nicht (weil er
vom Gärtener Gott dem Himlischen Geist / mit
seinem gnaden Tau / befeuchtet) verwelcken kön-
nen.

Daher er denn seine edle fruchte reichli-
chen getragen. Es hat auch dieser Garte nicht
können vnfruchtbar sein vnnnd bleiben / sinte-
mahl er zu ezlichen mahlen / im jahr / mit dem
Rosynfarben Blut Jesu Christi betünget ward
Es ward auch in diesem garten gefunden / das
edle kraut gedult / vnnnd wolgemuht / welchs in
allen garten nicht wechset / wie denn diese selige
Matron / in grosser gedult / ihr vielfeltiges elend
vnnnd Kranckheit getragen.

E

Sie

Sie ist auch in ihrem leben der Arme garte
gewesen / dessen sich die lieben Armen / recht
wol genüet vnd gebraucht / wie er in seiner
flor gestanden / wie denn ihr Gremmenschen
nebenst mich / ihr diß gezeugnis geben werdet /
das sie mit raht vnd that / Menschlichen vnd
Gebürlichen vormögen nach / einem jedern ger-
ne geholffen / vnd sich der heiligen nohturfft
mit höhestem vleis angenommen.

Dieses garten Zaun / der Körper / ist nu
letzlichen von der greulichen wilden Saw / dem
grimmigen Todte / zerwüet vnd ombgerissen /
Weil er aber ein teürgelaufter Acker vnd gar-
te Jesu Christi ist / dafür er blutige bezahlung
gegeben : So kan vnd magt die edle Seele
vnbeymet (mit dem leibe) vnd vnbeyget
nicht bleiben / sed, Non immemor ille requi-
ret sua munera fidor & author, Propriique æ-
nigmata vultus.

Also ist / dieser seligen Matron / ihr jam-
mer / trübsal vnd elend kommen zu einem seli-
gen end / vnd hat getragen Christi joch / ist ge-
storben vnd lebet noch. Hat sie na des leidens
viel / vnd ihr Segneur vnd Helle hier gehabt /
so

so wird sie nu desto reichlicher wider getröstet /
vnd ist kommen aus grosser trübsal / vnd hat
ihre Kleider gewaschen vnd helle gemacht in
Blut des Lambs Gottes / darumb ist sie nu für
dem Stuel Gottes / vnd dienet im tag vnd
Nacht in seinem Tempel / Apoc: 7. Ihre Seele
ist nu in Gottes Handt (von dem sie auch kom-
men ist) vnd keine Quall rüret sie an / Denn
leib wollen wir nu der Erden / dauon der seinen
vrsprung hatt / beuchlen / vnd lassen ihn schlaf-
fen / gehen allheim vnser strassen / schicken vns
auch mit allem fleis / denn der Todt kömpt vns
gleicher weis / vnd vns getrösten der wider
zusammen kunfft. Solchs behelffe vns
semptlichen / vnd einem jedern in sonder-
heit / die hohe / Heilige Göttliche
Dreyfaltigkeit / Gott Vater /
Gott Sohn / Gott heiliger
Geist / hochgelobet in
ewigkeit.

A M E N.



Gedruckt zu Berlin durch Nicolaum Volken

ANNO M. D. LXX XIII.

E I N I S.



Faint, illegible text in a Gothic script, likely bleed-through from the reverse side of the page. The text is arranged in approximately 15 horizontal lines.

ANNO M.D.LXXIII
F I N I S





78 L 1744

ULB Halle 3
003 075 29X




Sb.

VD17

Retro







Ein Christliche Leichpredigt

In der Sepulture

der Edlen / vnnnd vieltugentsamen
Matronen Ermgardten von Jagow / Christoff
von Bredowen seligen / weilandt auff Grem-
men etc. erbgeseffen / widwen / gehalten
den 13. Octobris anno 84. vnd zu trost
den nachgelassenen Erben vnnnd zu
gehöriger freundschaft in druck
verfertiget.

Durch.

Jacobum Schrödern Pfarhern
zu Kremen.

Rom: 14.

Vnser keiner lebet im selber / vnser keiner stirbt
im selber / leben wir / so leben wir dem Herrn
sterben wir / so sterben wir dem Herrn / darumb
wir leben oder sterben / so sind wir des Herren /

Gedruckt zu Berlin / Durch Nicolaum Volken.
Anno M. D. LXXVIII.

